

Grischun po sajettar singuls lufs

■ **(cc) La confederaziun ha concedi la permissiun dumandada dals chantuns Grischun e Son Gagl per sajettar dus lufs da la rotscha dal Calanda. Ils lufs vegnan sajettads en convenientscha directa tranter ils dus chantuns.** La fin da november han ils chantuns Grischun e Son Gagl dumandà la confederaziun ina permissiun per sajettar dus lufs da la rotscha dal Calanda. Cumbain ch'i n'ha fin uss anc dà naginas situaziuns privlusas per l'uman vegn il cumportament da singuls da quests animals valità sco problematic. Tras las sajettadas permessas da l'Uffizi federal d'ambient (Ufam) duain ils lufs puspè daventar pli timids per ch'els guntgeschian ils umans ed ils abitadis.

Er l'Ufam è da l'avis dals dus chantuns, numnadain ch'il svi-

lup dal cumportament dals lufs da la rotscha dal Calanda stoppia vegnir valità sco «problematic». Senter che la rotscha lufs è per ordinari sa cumportada ils onns 2011 fin 2013 da maniera timida envers l'uman hai stui vegnir constatà en il decurs da l'onn 2014 pli e pli savens che singuls animals demussan in cumportament marcant e nungiavischà. Ils lufs èn s'avischinads pli e pli savens als abitadis ed èn stads cleramain damain timids envers umans ed envers vehichels. Quest cumportament problematic è il cumenzament d'in svilup negativ. Consequentamain ston ins impedir ch'i resultia in cumportament aggressiv envers umans. Quai vegn pretendi er d'experts internaziunals da lufs che recumondan als pajais cun preschientscha da lufs d'allontanar da la populaziun da

lufs animals ch'èn pauc timids u che demussan in cumportament aggressiv envers umans.

Las basas giuridicas èn avant maun

Tras la revisiun parziala da l'ordinaziun federala da chatscha ha la confederaziun stgaffi la stad 2015 las basas giuridicas necessarias per ina intervenziun. Per ina intervenziun ston esser ademplidas las suandantas premissas: ils lufs èn sa reproducids cumprovadamain durant l'onn current, ed els èn sa mussads repetidamain entaifer ils abitadis u en la vischinanza directa da tals, cumbinà cun ina pitschna timidatad envers ils umans. La disposiziun necessaria per sajettar ils lufs vegn publicgada ed a las federaziuns per l'ambient vegn ella comunitgada directamain.

